

順治 — 嘉慶朝

清實錄經濟史資料

國家財政編·肆

陳振漢 熊正文 蕭國亮 編



北京大學出版社
PEKING UNIVERSITY PRESS

7. 山東

(康熙四、四、庚申) 命山東總督祖澤溥發常平倉粟給濟南、兗州二府被災貧民，并諭地方官捐輸賑濟。(聖祖一五、二)

(康熙一三、二、戊戌) 發山東濟南倉積穀，賑給濟南府地方饑民。(聖祖四六、三)

(康熙二四、九、丙戌) 戶部議覆：山東巡撫張鵬題報，兗州、青州二府屬州縣被水災處，應委員踏勘。得旨：朕去歲巡行，經高唐、濟寧等處，見小民生業艱難，今又值水災，恐致流離失所，著速遣才能官員踏勘，俟其到時詳議蠲賑之法，奏聞。(聖祖一二二、一五)

(康熙二五、二、丙午) 賑濟山東郟城等五州縣饑民。(聖祖一二四、一九)

(康熙三七、二、乙丑) 戶部議覆：廣西道御史張泰交疏言，山東濟南、兗州、青州三府屬、泰安等州縣，連歲災荒，巡撫李煒並未奏聞，請敕該撫速行賑恤。應如所請。得旨：此事情爾部保舉賢能司官二員，前往會同該撫賑濟。(聖祖一八七、一一)

(雍正三、八、甲申) 諭山東巡撫陳世倌：據奏，歷城、聊城等州縣，秋禾被淹，農民失望，已飭各地方官撫恤等語。該撫務須督率有司，加意經理，毋使窮民失所。(世宗三五、一六)

(雍正四、二、庚寅) 諭戶部：朕軫念東省被水窮黎，粒食維艱。特允山東巡撫陳世倌之請，於大清河興工疏濬，令乏食小民得力役之資，為餬口之計。今天氣和暖，土脈鬆潤，正施耨插之時，去秋該撫奏請設廠煮賑，目下赴工者衆，粥廠可以停止。但念此就食小民，其中豈無老弱殘疾不能赴工者？煮賑既停，麥秋之期尚遠，此輩窮無所歸之民，或仍至失所，朕心深為惻然。應行文山東巡撫陳世倌，將不能赴工之窮民，查明若干，每日仍給與升合之資，俟至麥收後停止。所用銀兩，俱作正項開銷。該撫嚴飭各州縣官，務期實心奉行，以副朕養育百姓之至意。爾部速遵諭行。(世宗四一、二三)

(雍正八、七、甲午) 河東總督田文鏡疏報：山東兗州、曹州等各府州屬，於六月二十一等日，風雨連綿，山水暴發，臨河窪下之地，田禾、室廬多被淹沒。被水之民，請動用存倉穀石，大口每月給穀三斗，小口每月給穀一斗五升，各給兩月口糧；其房屋倒塌無力修理者，於藩庫存公銀兩內，每戶酌給銀兩，以為葺屋之費。得旨：前據總河嵇曾筠奏報南河水溢情形，知

山東地方有發水被淹之州縣，已諭令該撫，率同有司，就近加意賑恤。今覽該督所奏，朕心深為軫念。著照所請，轉飭司道府等官，仰體朕心，按戶速行散賑，務令均沾恩澤。其無力修理房屋者，著賞給銀兩，速行修葺，俾得安堵棲身，勿使一夫失所。至於賞給口糧，著於兩月之外增添一月；其應免錢糧之處，即曉諭停徵。著該督撫將如何蠲免之處，確查定議，奏聞請旨。（世宗九六、二四）

（雍正八、八、己亥）又諭：據河東總督田文鏡奏報，山東被水各州縣，朕已降旨，諭令動支銀穀，加意賑恤。茲聞萊州府屬之昌邑、壽光、濰縣，青州府屬之益都、沂水、博興、高苑、臨朐，濟南府屬之鄒平等縣，俱被水患，民舍田禾，不無傷損。著該督撫委員查勘，應否與從前所報州縣，一體加恩之處，一面辦理，一面奏聞。儻再有續報被水者，亦著遵照前旨，速行料理，毋使稽遲。（世宗九七、二）

（雍正九、一〇、乙卯）賑山東濱州、新城等八州縣水災饑民。（世宗一一、二四）

（雍正一一、一〇、己巳）賑山東德州、恩縣等十州縣水災饑民。（世宗一三六、一二）

（乾隆二、七、戊子）又諭 [總理事務王大臣]：今年春夏之交，直隸、山東兩省雨澤愆期，二麥歉收，朕已多方籌畫，接濟民食，且令直隸總督李衛查有應興工作，俾小民得藉營繕，以餬其口。今思山東民人，多仗二麥度日，今歲麥秋，收穫既薄，雖屢降諭旨，蠲賑平糶，仍恐閭閻尚有艱食之虞。著巡撫法敏悉心計議，如開渠築堤、修葺城垣等事，酌量舉行，使貧民傭工就食，兼贍家口，庶可免於流離失所矣。再年歲豐歉，難以懸定，而工程之應修理者，必先有成局，然後可以隨時興舉。一省之中，工程之大者，莫如城郭；而地方以何處為最要，要地又以何處為當先，應令各省督撫一一確查，分別緩急，預為估計，造冊報部。將來如有水旱不齊之時，欲以工代賑者，即可按籍而稽，速為辦理，不致遲滯，於民生殊有裨益。並將此諭通行各省督撫知之。（高宗四六、四）

（乾隆二、七、丙申）戶部議覆山東巡撫法敏疏報：德平、齊河、長清、肥城、濟南衛、商河、曲阜、寧陽、鄒縣、泗水、滕縣、嶧縣、金鄉、魚臺、濟寧、嘉祥、濟寧衛、單縣、城武、曹縣、定陶、鉅野、鄆城、范縣、觀城、朝城、蘭山、郳城、費縣、聊城、博平、茌平、清平、莘縣、武城、東昌衛、臨清衛、昌樂等州縣衛本年旱災；又續報陽穀、壽張、朝

城、莘縣雹災，動支存倉穀石，分別賑卹。得旨：依議速行。（高宗四六、一三）

（乾隆三、一、壬午）山東布政使黃叔琳奏：東省上年歉收，今歲正、二兩月已蒙加賑，惟三、四兩月，尚無接濟；請將極貧之戶，更廣貸粟之條。一、查實在無力貧民，酌動常平等倉穀，借給兩月口糧；願少借者聽便。一、貧民願借穀者，分定四鄉日期，令各執門牌親領，該州縣查明給發，毋令守候。一、今次借給口糧，非平時貸穀可比，遵例免其加息，於秋成後催徵，十月內全完。一、現在借糶兼行，或本地倉穀不敷，於鄰府州縣撥借者，應豫行酌定各廠穀數，查明道里遠近，即由撥發之處，徑運到廠，以省腳價。得旨：所議數條，頗為詳悉。與撫臣和衷共酌，若意見相同，一面辦理，一面奏聞。（高宗六一、一六）

（乾隆三、三、辛未）貸山東上年兩次被災之齊河、濟陽、禹城、臨邑、陵縣、德州、平原、德平、高唐、恩縣、聊城、清平、陽穀、壽張、朝城等十五州縣貧民。（高宗六五、一一）

（乾隆三、五、己未）賑恤山東章邱、鄒平、長山、新城、齊東、德州、泰安、萊蕪、寧陽、鄒、泗水、濟寧、沂水、高苑、壽光等州縣衛被雹災民。（高宗六八、八）

（乾隆三、六、辛卯）賑恤山東東平、掖縣、萊陽、招遠四州縣被雹災民。（高宗七〇、二一）

（乾隆三、六、癸卯）賑貸山東鄒平、新城、齊東、寧陽、鄒縣、泗水、濟寧、高苑八州縣被雹災民。（高宗七一、一三）

（乾隆三、九、丙辰）賑山東招遠縣本年雹災飢民。（高宗七六、九）

（乾隆四、四、乙巳）山東布政使黃叔琳奏：濟南等十府州縣衛被旱地畝，麥收歉薄，請預籌接濟。一、飭令地方官減價多糶，不必拘定糶三之數。一、借給籽種銀兩，秋收徵完。一、歉收地畝，分別緩徵。一、勘明實在貧戶，酌借倉穀及興修城垣河道，以工代賑。得旨：所奏俱悉。與撫臣竭力修省，和衷妥辦可也。（高宗九一、二二）

（乾隆四、六、庚辰）〔戶部〕又議覆：山東巡撫法敏疏稱，歷城、海豐、樂陵、濱州、利津、霑化、蒲臺、泗水八州縣被旱成災，應令該撫按照大小戶口，量給一月口糧，並按畝借給籽種銀兩。得旨：依議速行。（高宗九四、一〇）

（乾隆四、七、庚午）護理山東巡撫布政使黃叔琳題報：歷城、海豐、樂陵、蒲臺、濱州、泗水等州縣被災外，結報遲延之利津、霑化二縣二麥被

旱，遵旨加恩，請將二縣照依歷城等州縣加賑之案，極次貧俱加賑一個月。得旨：下部速議具奏。尋議，應如所請，並將結報遲延之知縣議處。從之。（高宗九七、一五）

（乾隆四、七、甲戌）護理山東巡撫布政使黃叔琳奏荷澤等六州縣衛，被水發賑情形。並稱，佃種之戶，因田主力能照管，是以例不予賑，今被水戶口，佃戶居多，田主自顧不暇，勢難贍及佃人。茲值災黎望救之時，似應查明田主無力、乏食之佃戶，一體賑濟。得旨：所見甚是。但須查察明確，使災黎得受實惠，雖費千萬朕亦不惜，若不能使民受賑恤之益，而徒飽吏胥，則升斗亦不可耳。（高宗九七、二六）

（乾隆四、九、庚申）戶部議覆：護理山東巡撫布政使黃叔琳續報臨邑、陵縣、滕縣、蘭山、郯城、日照、金鄉等縣，秋禾被水。應如所題，照歷城等六十六州縣之例，加意撫恤，分別賑濟。得旨：依議速行。（高宗一〇一、二）

（乾隆四、一〇、乙酉）戶部議覆：護理山東巡撫布政使黃叔琳疏稱，歷城、章邱、鄒平、長山、新城、齊東、齊河、禹城、長清、德州、德平、平原、德州衛、泰安、肥城、東平、東阿、平陰、惠民、青城、陽信、海豐、商河、濱州、利津、霑化、蒲臺、滋陽、魚臺、濟寧、嘉祥、汶上、陽穀、壽張、濟寧衛、東平所、荷澤、曹縣、定陶、鉅野、單縣、城武、鄆城、濮州、范縣、觀城、朝城、聊城、堂邑、清平、館陶、冠縣、臨清、邱縣、高唐、恩縣、夏津、博平、茌平、莘縣、武城、東昌衛、臨清衛、博興、高苑、樂安六十六州縣衛所，秋禾被水成災，查明衝塌房屋，分別極次貧戶，給銀修葺，併賑給口糧，借給籽種銀兩等語。應如所請。得旨：依議速行。（高宗一〇二、一四）

（乾隆五、三、庚午）山東巡撫碩色奏：東省上年偶被偏災，奏明以工代賑。查乾隆二年，東省雨澤愆期，蒙恩旨命前撫臣法敏酌行，使貧民傭工就食，兼贍家口。乾隆三年，河南撫臣尹會一奏請每土一方，給銀四分，則每夫一名，每日止得銀一分有零，安能贍及家口？臣懇恩每挑河土一方，准給銀七分二釐；築堤土一方，准給銀九分六釐，以資養贍。得旨：此係法敏錯辦者，朕若降旨允行，是豫省舊歲被災，較之東省尤甚，而受惠反輕，其可乎？（高宗一一三、二〇）

（乾隆五、九、丁酉）山東巡撫朱定元奏：撫恤蘭、郯二縣回籍流民事宜。得旨：如此辦理甚妥。知道了。（高宗一二七、三三）

（乾隆五、九、丁酉）〔山東巡撫朱定元〕又奏：濟寧、魚臺、滕縣等處被水，雖勘不成災，恐貧民不無拮据，現飭借給社穀接濟民食，至被水田

畝，有缺籽種者，亦飭地方官每畝給銀，督令廣行播種，豐收還項。得旨：如此諸凡留心民瘼，方副朕望也。（高宗一二七、三三）

（乾隆六、九、辛卯）山東巡撫朱定元奏報得雨情形。得旨：賑恤之事，不可因武場而稍緩也。（高宗一五一、二三）

（乾隆七、一〇、壬子）賑山東鄒縣續被水災飢民。（高宗一七七、一六）

（乾隆七、一二、丙戌朔）加賑山東濟寧、滕縣、嶧縣、金鄉、魚臺、鄒縣、臨清衛等七州縣衛水災饑民。（高宗一八〇、二）

（乾隆七、一二、乙卯）山東巡撫晏斯盛奏：安插江南流民，俱各妥協，但時已歲底，將屆春耕，現留養者，尚應送回。無如方來者猶紛紛不絕，未必非江省已賑之民，又思冒濫鄰省之養。若不定以限制，非惟糜濫賑資，抑且有誤東作。請以來歲正月為始，到境者悉資送還鄉，交原籍地方官；查明已未領賑，並借給種糧，俾勤力作。其現在留養者，以二月底為止，盡資送回籍；其不願回者，聽自行謀食。並咨明江省，一體查辦。得旨：所見甚是。知道了。（高宗一八一、三五）

（乾隆八、一、甲申）山東巡撫晏斯盛奏：東省收養江南饑民甚衆，今資送回籍。應豫定章程。現飭屬分起資送，仍委員稽查，俾無滋事。或本境正當資送，又值隣邑送到災口，及衝衢數起同到者，亦酌量先後而行。其停待境內者，照留養之例，日給口糧。至資送路費，照例給發。年老有疾者，酌給腳力銀三分；水程減半。俱令州縣動支庫貯，事竣報銷。至無產游民，在東傭作，令僱主具保。其自行營業者，令地方牌甲等，留心查察。得旨：所奏俱悉。仍當實力稽查，毋使屬員欺朦也。（高宗一八三、一四）

（乾隆八、三、戊午）〔戶部〕又議覆：山東巡撫晏斯盛疏稱，上年被水地畝，惟鄒縣地已全涸，堪種春麥；其滕縣、魚臺、濟寧、金鄉、嶧縣、臨清六縣衛，泥淖難耕，別無補種地畝。請於例賑外，自本年三月為始，極貧加賑三個月，次貧加賑兩個月。應如所請，於本處倉糧動給；不敷，於鄰屬協撥。從之。（高宗一八六、五）

（乾隆八、閏四、壬午）署山東巡撫、布政使包括奏：東省雨澤愆期，除報齊勘實，循例借貸外，有收成六分，於例不應成災，而計其所穫，與成災之五分同者，請動常平等穀出借，並予免息還倉。得旨：著照所請行。（高宗一九一、一五）

（乾隆八、五、辛丑）賑山東歷城、章邱、鄒平、長山、新城、齊河、齊東、濟陽、長清、青城、蒲臺、博平、茌平、高苑、濟南、肥城、東阿、平陰十八州縣衛旱災飢民。（高宗一九三、七）

(乾隆八、一一、己酉)山東巡撫喀爾吉善奏辦理賑務情形。得旨：山東流民至京師者頗多，此必賑卹有不遍給者耳。尚應飭屬員加意妥辦，不應存爲國家惜費之小見也。(高宗二〇五、二四)

(乾隆九、三、乙巳)諭：山東德州、海豐、樂陵、陽信、德州衛五州縣衛，上年遭值旱災，聞今春又復少雨，麥收失望，窮民艱於謀食。著該撫酌量各處情形，加賑四月一個月，毋令窮民失所。該部即速傳諭該撫知之。(高宗二一三、一七)

(乾隆九、四、丁丑)[山東巡撫喀爾吉善]又奏：東省曹、沂、兗、泰等府屬，雨澤調勻；惟濟、武所屬，被旱成災，除奉旨將德州等五州縣衛，加賑四月一個月外，其餘被旱之處，賑、糶、借三者，急需兼行。現擬於本省豐收之曹、沂等府，廣爲採買。已密飭各該州縣，先期密辦。至糶數不拘多寡，即運送濟、武災屬應用。得旨：此甚善之舉也。(高宗二一五、二八)

(乾隆九、六、甲寅)卹山東濟南府屬之歷城、章邱、鄒平、齊河、齊東、濟陽、禹城、臨邑、長清、陵縣、德州、德平、平原、德州衛並歷城、齊河、濟陽、長清四縣收併濟南衛；泰安府屬之肥城、平陰，並肥城縣收併濟南衛；武定府屬之惠民、青城、陽信、海豐、樂陵、商河、濱州、利津、霑化、蒲臺，並商河縣收併濟南衛；東昌府屬之博平、高唐州、恩縣；青州府屬之博興、高苑、樂安等三十二州縣衛，被旱災民。又沂州府屬之蘭山、蒙陰、沂水三縣，東昌府屬之博平、臨清、館陶三州縣被雹災民。(高宗二一八、八)

(乾隆九、七、壬寅)戶部議覆：山東巡撫喀爾吉善奏報，山東二麥被旱之歷城、章邱、鄒平、齊河、齊東、濟陽、禹城、長清、平陰、肥城、青城、蒲臺、蒙陰、沂水、博平、臨清、恩縣、博興、高苑、樂安、陵縣、德州、德州衛、德平、平原、惠民、陽信、海豐、樂陵、商河、濱州、利津、霑化、臨邑、高唐三十五州縣衛，應請一體借給籽種、口糧。得旨：依議速行。(高宗二二一、二三)

(乾隆一〇、一〇、丁卯)山東巡撫喀爾吉善奏報：安頓江南因災流至東省貧民，願回籍就賑者，資送回籍；願留養者，照例留養。得旨：好。知道了。(高宗二五一、二一)

(乾隆一〇、一二、丁巳)豁免山東濟寧州乾隆五、六兩年因災借給貧民未完籽種銀一百七十兩有奇，社倉穀五百三十石有奇，豆一千九石有奇。(高宗二五五、一七)

(乾隆一一、八、戊辰)諭：山東省今夏被水各州縣，據巡撫喀爾吉善

先後題報，查勘分別辦理。除勘實成災各屬已加恩蠲賑外，其勘不成災州縣，雖被淹稍輕，晚禾收成究屬歉薄，朕心軫念。著喀爾吉善查明各州縣實在無力貧民，按戶酌借口糧，按畝酌借麥本，俾得及時播種秋麥。所有借給麥本銀兩，於來歲麥熟後徵還；出借口糧，於來歲秋收後免息徵還。此等被淹地畝，本年應徵錢糧，著緩至來歲啓徵，以紓民力。該部即遵諭行。（高宗二七二、八）

（乾隆一一、九、辛酉）諭：山東武定府屬海豐縣，上年秋禾被旱，經該撫奏准，於例賑之外，借給本年四月分一月口糧，並酌借籽種。又樂陵縣今夏二麥被旱成災，照例借給籽種、口糧。海豐、霑化、陽信三縣，麥收歉薄，復加恩一體借貸接濟。此項出借籽種，均應於秋收後照數徵還。但念此四縣今歲秋禾雖屬有收，究係積歉之後，且均有新舊錢糧漕項應行輸納，若再將前項借欠，同時並徵，民力未免拮据。著將海豐等四縣，本年麥後因災出借籽種、口糧銀穀，並海豐縣所借四月分口糧、籽種銀兩，一併緩至來歲麥秋後，徵收還項，以紓民力。再德州、德州衛、陵縣、德平、武城、清平、長清、高唐八州縣衛，亦曾出借籽種，此內或有似此，難以併催全完者，著新任巡撫塞楞額，察看情形，酌量分別緩徵，造冊報部。該部即傳諭該撫知之。（高宗二七五、一二）

（乾隆一一、一一、丙申）諭：今歲山東被災州縣，朕已加恩賑恤，又經分別加賑，以濟民食。但聞壽光、樂安、博興、金鄉、魚臺、汶上、濟寧、東平八州縣，被災較重，歲內支領賑糧，尚可餬口，來春去麥收尚遠，食用未免艱難。著於例賑之外，極貧再加賑兩個月，次貧再加賑一個月，於來歲二三月間，按月給發，務使貧民均霑實惠。該部遵諭速行。（高宗二七八、三）

（乾隆一一、一一、己酉）又諭：今歲山東被災州縣，朕經疊次加恩賑卹，復念沂州府屬之郯城縣，本年被水成災，亦至八九分，且該縣地瘠民貧，來春未免拮据。著照壽光等八州縣之例，極貧再加賑兩個月，次貧再加賑一個月，俾得均霑實惠。該部遵諭速行。（高宗二七九、七）

（乾隆一二、一、丁未）諭：山東被災州縣，朕已疊次施恩，加展賑卹月分，即春月青黃不接之時，災黎均得餬口。惟是被災六分之次貧，上年雖薄有收穫，而春來勢漸艱窘。但格於定例，不在加賑之內，不無向隅之苦。著將壽光、樂安、博興、金鄉、魚臺、汶上、濟寧、東平、郯城等九州縣內被災六分之次貧，加恩給賑一月，以資接濟。（高宗二八三、一）

（乾隆一二、一、己酉）諭：上年山東被水地方，已於例賑之外，分別

加賑。今朕思萊州府屬之平度、昌邑、濰縣、高密四州縣，被災雖止六七分不等，然當此東作方興，一經停賑，恐災黎或致失所。著將平度等四州縣，無論極次貧民，再加賑一個月，於二月內給發，以資接濟。該部即遵諭行。（高宗二八三、四）

（乾隆一二、二、庚辰）諭：東省蘭山縣去秋被災，雖止五分，而入春以來尚未得雨，小民艱於粒食，若僅酌借口糧，恐未足以資接濟。著該撫阿里衮查明實在乏食貧民，加恩賑濟一月，俾耕作有資，毋致失所。該部遵諭速行。（高宗二八五、三）

（乾隆一二、四、甲子）諭：山東東平、聊城、莘縣、東昌衛上年被水成災，業已加恩賑卹，但目下正值青黃不接之時，民食難免拮据。著將此四州縣衛被災貧民，再行加賑一月，俾得餬口有資。該部即遵諭速行。（高宗二八八、六）

（乾隆一二、四、癸酉）又諭：據阿里衮奏稱，前因敘奏不明，將東平一州與聊城、莘縣、東昌衛三處災民，並請加賑一月口糧，已蒙恩旨允准，勅部頒發到臣。今查東平州上年被災七分，已節次題請分別賑卹，今春復荷恩加展賑月，該處貧民現在足資餬口，毋庸再議加賑；惟有被災未入賑冊之貧民，上年未得一體賑卹，此時轉覺貧苦艱難，請與聊城、莘縣、東昌衛三處，一併加賑，已飭各該處速行遵照辦理，俾得早霑惠澤等語。是東平州被災戶口，已經加賑者，可以毋庸再行加展；其未入賑冊之貧民，據奏與聊城等處一例，待澤甚殷，現已飭屬速行查辦。著傳諭阿里衮，即照伊所奏辦理，使貧民均霑實惠。……（高宗二八八、三一）

（乾隆一二、五、辛卯）諭軍機大臣等：山東沂州府蘭山縣，上年被災之後，朕已加恩借給口糧，今春又加賑一月；目今賑期已過，聞該處雖得雨，而牛具、籽種俱力有不能，此際即官為借給，亦已過時，誠恐秋成無望，朕心深為軫念。可傳諭阿里衮，察看現在情形，應如何加恩撫卹接濟，俾窮民得霑實惠，不致失所之處，速行詳悉查辦，一面料理，一面奏聞。尋奏：蘭山縣現在連得雨澤，麥收實有八分，秋禾亦俱暢茂，間有被雹之處，並無損傷，民情寧帖，無庸再行撫卹。得旨：覽奏稍慰。（高宗二九〇、一）

（乾隆一二、五、丙申）諭：上年山東被水各府州縣衛，屢降諭旨，分別賑卹；朕又念歉收之後，宜加撫綏，復經降旨，令該撫將被水州縣於現在賑卹之外，酌量加賑，以資接濟。今據阿里衮奏稱，安邱、諸城二縣，原報被災五分之各村莊，例不加賑，但今春雨水短少，米價昂貴，小民謀食艱難；其餘原未報災之各村莊，雖稍有收穫，歷今半載有餘，窮乏戶

口，未免拮据，請加賑一個月等語。安邱、諸城二縣，無論已未成災，俱著加賑一個月，俾貧民餬口有資，勿致失所。該部即遵諭行。（高宗二九〇、九）

（乾隆一二、五、乙巳）又諭：山東沂州府蘭山縣上年被災歉收，民人乏食。朕已降旨令阿里衮察看本地情形，應如何加恩接濟，即行辦理。又登、萊、青三府亦有被旱歉收之處，前據阿里衮祇報安邱、諸城二縣，朕聞不止於此，不知近日麥收如何？民間情形如何？若有應須酌量籌畫接濟者，一面奏聞，即一面速行辦理，務使貧民不致失所。因目前時日已迫，不可再遲。尋奏：查益都等處，接續被災，其中安邱、諸城二縣，已蒙賑給一月口糧。現在麥禾失收，仍須賑給。再查諸城縣並安東等衛被旱，請一例辦理。得旨：著照所請速行。該部知道。（高宗二九一、四）

（乾隆一二、六、壬申）山東巡撫阿里衮奏：東省雨澤愆期，德州鄒縣等三十二州縣衛，照例借給籽種、口糧外，其青州府屬之益都、博興、高苑、安邱、諸城，萊州府屬之平度、昌邑等七州縣，上年秋禾被水，今歲二麥旱災，民情益增拮据，照例借給籽種、口糧外，再請按戶計口，賑給一月口糧。得旨：著照所請行。該部知道。（高宗二九二、二三）

（乾隆一二、七、庚寅）諭軍機大臣等：山東沂州府屬之蘭山縣，上年收成，祇有五分，雖不成災，而已歉薄可念。今年春又復被旱，近又被水。該縣連年災歉，與他州縣不同，所有一應撫卹安輯之處，著阿里衮加意籌畫辦理，於伊奏摺之便寄去。（高宗二九四、三）

（乾隆一三、二、癸酉）諭：山東上年被災州縣頗多，雖屢加恩賑濟，期災民不至失所。今清蹕巡歷，深用惻然。損上益下，厥有明訓；以休以助，是謂常經。其再加恩，將經過被災州縣，無論極貧次貧，於現賑外普行加賑一月；其不經過處所，被災七分以上者，極貧之民亦加賑一月，以示優卹。該部即遵諭行。（高宗三〇九、九）

（乾隆一三、三、己酉）諭：山東興修沂河兩岸隄埝工程，該部議照以工代賑之例，土方工價，准給一半，乃係向來成例，自應照此給發。惟是東省被災甚重，其民情之艱窘，實非他處可比，若拘常例給發，恐赴工之民，仍不足以餬口。著加恩將此項土方工價，按數全給，俾其食用有資。該部即遵諭行。（高宗三一、二三）

（乾隆一三、七、癸卯）賑恤山東歷城、淄川、長山、新城、長清、德州、泰安、樂陵、鄒縣、汶上、費縣、益都、臨朐、樂安、昌樂、鄒平、青城、商河、泗水、滕縣、嶧縣、單縣、曹縣、臨淄、高苑、掖縣、金鄉、城

武、寧陽等二十九州縣被旱、被水、被雹、被蟲、被坍貧民。(高宗三一九、一六)

(乾隆一三、一〇、己丑)賑卹山東鄒平、長山、新城、濟陽、滋陽、寧陽、鄒縣、金鄉、魚臺、濟寧、汶上、博興、樂安、壽光、平度、昌邑、濰縣、膠州、高密及濟寧衛二十州縣衛水災貧民。(高宗三二六、二三)

(乾隆一三、一一、戊午)諭：山東今歲應徵之因災出借各穀七十六萬餘石，春借穀四十六萬石，又本年帶徵之穀十數萬石，及麥本、籽種、漕倉項下應徵積欠錢糧，爲數甚多，一時銀穀並徵，即屬大豐，以一年而完積年之欠，民力未免拮据。著加恩於今歲歲底截數，所有未完穀石內，將春借一項，於明年麥熟後徵收一半，秋成徵收一半，留其餘力，以輸該年正供；其歷年因災出借之常、監等穀，概寬至庚午年起，分作五年帶徵，俾小民紓徐完納，以示優卹窮黎之意。該部即遵諭速行。(高宗三二八、二三)

(乾隆一四、一、乙卯)諭：山東鄒平等二十州縣衛，上年被水偏災，而萊州府屬之平度、膠州等處爲獨重，雖經降旨多方賑卹，但按月計算，此時賑務將次告竣，去麥秋尚遠，積歉之區，青黃不接，朕心深爲厪念。著將最重之平度、膠州、高密、昌邑四州縣，無論極次貧民，概行加賑一個月。被災稍重之新城、金鄉、魚臺、濟寧、博興、樂安六州縣極貧之戶，加賑一個月。仍照前例，銀穀兼賑。其餘災輕之處，及時借糶，以濟民食。該撫準泰其督率屬員，實心辦理，務俾窮黎安居力作，以待麥收，慰朕軫恤之意。(高宗三三二、二一)

(乾隆一四、一一、甲戌)[山東巡撫準泰]又奏：前山左偏災，已奉恩旨，民欠常平倉穀，自庚午年起，分五年帶徵。其節年出借商社等穀，及乾隆十三年出借籽種，俱自己巳年起，分三年帶徵。今據益都、臨朐二縣稟稱，除遵照辦理外，內有商社穀及籽種銀，均係借給零星之戶，數本無多，各花戶因豐收糧賤，有願一併完納者，應聽民便。各屬如有類此者，一體辦理。報聞。(高宗三五三、一八)

(乾隆一五、九、甲寅)諭：據山東巡撫準泰奏稱，沂河南北兩岸隄埝，原係民築民修，但當成災之後，責其趨築，不無拮据。援照向例，借給食米，又各戶牛隻冬月草枯，無力飼餵，亦請援例借給牧費，統俟來年徵還等語。今歲山東所在豐稔，惟蘭山、郯城夏秋被水，其諸借項，著加恩賞給，免其徵還，以恤災黎。該撫加意辦理，查冒開侵溢之弊，俾小民均霑實惠。該部即遵諭行。(高宗三七二、一四)

(乾隆一五、一一、癸丑)加賑山東嶧縣、蘭山、郯城、平度、昌邑、

膠州、高密等七州縣本年分水災飢民有差。(高宗三七六、三二)

(乾隆一六、二、辛未)諭：上年東省雖獲有秋，而蘭山等七州縣，偶被偏災。加恩賑恤，民食固不至缺乏。但農事方興，麥秋尚早。清蹕所經，見蘭山、鄒城二縣，民氣似遜他處，深為軫念。著將蘭山、鄒城二縣極次貧民，俱加賑一月。其未經過之嶧縣、平度州、膠州、高密、昌邑五處，被災稍輕。著將極貧之民，加賑一月。令該撫準泰查明辦理。務使均霑實惠。該部遵諭速行。(高宗三八二、三)

(乾隆一六、九、丙寅)又諭：東省所屬州縣，前據準泰先後奏報被水者七十餘處，其間成災不成災尚須分別確勘，而為地甚廣。看來今歲外省偏災，浙江最重，其次即係山左。該省積歉之餘，上年秋成稍豐，而元氣未復，今復被潦，亟宜加意撫綏。準泰摺奏，請留秋撥案內存庫地丁銀兩，以備賑卹。第民食所需，米糧為急，如使升斗維艱，即得現銀，何從告糴？但今歲各省漕糧，截留已多，東省賑務，著鄂容安盡心籌畫，亦不必拘泥。其商販可通，易於購買之州縣，自可給予米折；其艱於購買之區，或應向隣省採買，或應動撥倉儲。均令通盤計算，妥協辦理，務俾災黎得所。再，運河一帶隄工並東平決口疎防實在情形，據實嚴查，秉公究擬，速行奏聞。(高宗三九八、五)

(乾隆一六、一二、庚子)加賑山東鄒平、長山、新城、長清、禹城、泰安、肥城、萊蕪、東平、東阿、平陰及收併濟南衛、青城、陽信、海豐、樂陵、濱州、利津、霑化、滋陽、曲阜、寧陽、金鄉、魚臺、濟寧、嘉祥、汶上、陽穀、壽張、濟寧衛、東平所、荷澤、曹縣、定陶、鉅野、濮州、范縣、觀城、聊城、茌平、莘縣、朝城、冠縣、館陶、夏津、東昌衛、臨清衛、博興、高苑、樂安、壽光、高密、即墨及收併大嵩、浮山二衛所等五十五州縣衛所本年水災貧民，并貸麥本牧費。(高宗四〇四、九)

(乾隆一八、一二、庚寅)加賑山東蘭山、鄒城二縣本年水災飢民。(高宗四五二、一八)

(乾隆一九、八、丙子)署山東巡撫郭一裕奏：東省節年民借倉穀，請兼收雜糧，以一麥抵二穀，高粱、黃豆照數徵收。所收高粱麥豆，明春平糶之時，先行出糶，秋後易穀還倉。得旨：如所議行。(高宗四七一、二〇)

(乾隆二一、二、壬戌)諭：上年東省沂州府等屬州縣，秋禾被災，業已降旨照例賑卹，並增給折賑銀兩，令該撫加意撫綏。但念麥收之期尚遠，當此青黃不接，災黎餬口艱難，深為軫念。著查明被災州縣內，分別加恩，最重者加賑兩個月，次重者加賑一個月。該撫務督率有司，實心經理，俾窮

民均霑愷澤。(高宗五〇七、一一)

(乾隆二一、三、辛未)加賑山東鄒縣、滕縣、嶧縣、濟寧、金鄉、嘉祥、魚臺、蘭山、郟城、費縣、城武、鉅野、臨清、壽光、樂安、濰縣十七州縣衛秋禾被災貧民。(高宗五〇八、一一)

(乾隆二一、三、己卯)署山東巡撫白鍾山奏：上年被災鄒縣、滕縣、嶧縣、濟寧、金鄉、嘉祥、魚臺、蘭山、郟城、費縣、城武、鉅野、臨清、壽光、樂安、濰縣十七州縣衛，已蒙恩賑，請將竈地貧民，亦歸於坐落州縣，一體加恩。從之。(高宗五〇八、二二)

(乾隆二一、一二、辛巳)加賑山東濟寧、金鄉、魚臺、滕、嶧等五州縣本年水災饑民。(高宗五二九、五)

(乾隆二二、一、壬子)諭：山東之濟寧、金鄉、魚臺、滕、嶧等五州縣衛，上年偶被水災，已降旨於加恩賑卹之外，加賑兩個月，以資接濟。今翠華經臨，念閭閻春作方殷，麥秋有待，著再加賑一個月。該撫其董率屬員，實力查辦，以副朕軫恤災黎至意。(高宗五三一、七)

(乾隆二二、七、庚子)諭曰：鶴年所奏查勘各州縣被水成災並續報河流漫溢情形一摺，前因漳河暴漲，驟注衛河，館陶等縣衛被水成災，而濟寧、魚臺、金鄉等處已涸之地，又復淹浸，即經降旨令該撫鶴年加意撫卹。今據該撫親往查勘及據各屬續報，此次被水成災者，有館陶、武城、臨清州、臨清衛、冠縣、夏津、朝城、堂邑、邱縣、單縣、恩縣、范縣、德州衛、濮州衛、曹縣、壽張等十七州縣衛。嘉禾徧隴，轉瞬秋成，猝被水災，農民失望，室廬蕩析，棲息無所，朕心深為軫念。所有被水各屬，俱著該撫遵照前旨一體加意撫卹，並各賞給急賑銀兩，毋拘秋災成例。其房屋坍塌者，即速給價修葺，毋令久處苫舍，致滋疾病，以慰朕懷保小民至意。至館陶隄埝，向例雖係民修，但今被災已重，生計拮据，何忍復責以工役之事？著即遴委道府大員，星速動帑估修，捍禦來路，期令速涸；若水退之後有可補種苡麥者，即酌借籽種，勸諭乘時補種，接濟口食。該撫鶴年，其善體朕意，妥協經理，務俾災黎不致稍有失所。該部即遵諭行。(高宗五四二、二四)

(乾隆二二、七、丙午)又諭曰：鶴年奏報東平等州縣續被水災一摺。東省館陶等州縣衛，猝被水成災，業經屢降諭旨加恩撫卹，俾無失所。其續報泰安府屬之東平州、東阿，沂州府屬之蘭山、郟城等州縣，即著該撫鶴年遵照前旨，一體查辦，並各賞給急賑銀兩，以資接濟，俱不得拘泥成例，俟十月後方行給賑。該部遵諭速行。(高宗五四三、二)

(乾隆二三、二、乙丑)加賑山東德州、東平、東河、滋陽、鄒縣、滕

縣、嶧縣、金鄉、魚臺、濟寧、汶上、陽穀、壽張、荷澤、單縣、城武、曹縣、濮州、范縣、觀城、朝城、蘭山、鄒城、費縣、堂邑、冠縣、臨清、邱縣、館陶、恩縣、夏津、武城、德州衛、濟寧衛、東昌衛、臨清衛、東平所等州縣衛所水災軍民。(高宗五五六、一三)

(乾隆二三、一二、丁丑)又諭：東省乾隆二十、二十一兩年加賑補給折穀銀兩，著加恩照該撫所請，一體准其報銷。其該省從前十二、十三兩年例外補給之項，念係因災賑卹，且事逾十餘年，所有原辦錯誤之地方各官，及未經覈駁之戶部堂司官，均免其分賠議處。(高宗五七七、二五)

(乾隆二四、一二、甲午)加賑山東海豐、利津、霑化、樂安、平度、膠州、高密、即墨、德州衛、冠縣、臨清、館陶、夏津、武城、恩縣、臨清衛等十六州縣衛，永阜、永利、王家岡等三場本年被水被潮貧民。(高宗六〇三、一一)

(乾隆二五、四、戊戌)山東巡撫阿爾泰奏：查節年民欠米穀，例應麥後徵還，但民間糶麥買穀還倉，麥多價減，穀少價增，折納未免竭蹶。除原借之麥照常交收外，其應還米穀者，請以麥抵穀。細察現在情形，以麥六斗抵穀一石，聽民交納，倘有情願以穀交倉者，仍聽其便。俟新穀登場，令該州縣照例易穀，遇平糶之時，儘麥先行借糶，俾無久貯。得旨：甚妥。(高宗六一一、八)

(乾隆二六、七、丙寅)又諭：……阿爾泰奏：漳、衛異漲，致臨清衛大營西隄，及館陶縣之漳河北安隄，間有漫溢。現在興工修築，並委員分赴被水村莊查勘撫卹。報聞。(高宗六四一、二三)

(乾隆二六、九、乙丑)賑貸山東齊河、濟陽、禹城、臨邑、長清、德州、平原、德州衛、惠民、陽信、海豐、樂陵、商河、霑化、金鄉、魚臺、濟寧、嘉祥、陽穀、濟寧衛、荷澤、城武、定陶、鉅野、聊城、冠縣、臨清、恩縣、夏津、武城、東昌衛、臨清衛、東平、汶上、曹縣、單縣、濮州、范縣、壽張、東阿、德平、東平所、陵縣、館陶、邱縣等四十五州縣衛所本年水災貧民，並予葺屋銀兩。(高宗六四五、二三)

(乾隆二七、一、甲寅)諭：去秋山東被水偏災各屬，雖不至如豫省之重，但現在時當青黃不接，例賑又應停止，小民生計未免拮据。因傳諭該撫阿爾泰，令將各處被災分數，查明具奏。今據奏到，被災較重之曹縣、城武、德州、濟寧、魚臺等五州縣，著加恩無論極貧、次貧俱行加賑一個月；其濱河次重之齊河、金鄉、嘉祥、荷澤、單縣、定陶、鉅野、濮州、范縣、臨清、邱縣、館陶、恩縣、夏津、武城等十五州縣，成災在八分以上，所有

貧民及衛地貧軍，亦著加恩展賑一個月，以資接濟。該撫其董率屬員，妥協經理，務俾閭閻均霑實惠，副朕軫念窮黎至意。（高宗六五三、三）

（乾隆二七、一、戊午）諭：東省去秋被水偏災各屬，已疊降恩旨，多方撫卹，茲朕鑒與臨幸，體察民依，雖閭閻氣象和樂，而災黎元氣始復，深為廑懷。該省尚有歷年未完民欠常平商輪等穀，及籽種麥本牛具等銀，例應照數徵收還項，著再加恩，將惠民、商河、霑化、金鄉、魚臺、濟寧州、濟寧衛、荷澤、單縣、城武、曹縣、定陶、范縣、館陶、臨清衛等十五州縣衛，自乾隆十年至二十四年民欠常平商輪等穀三萬七千餘石；又金鄉、魚臺、濟寧等三州縣，二十二、三、四等年民欠籽種麥本牛具等銀一萬四千九百餘兩，概予豁免，俾民力益加寬裕，足資耕作，副朕嘉惠災黎至意。該部遵諭速行。（高宗六五三、九）

（乾隆二七、一二、壬辰）諭軍機大臣等：阿爾泰奏覆東省災屬情形一摺，所有被災極貧之齊河等三十州縣衛概予加賑一月之處，俟新正有旨諭部。但歲內賑期已滿，若俟降旨後始行加賑，貧民口食，恐不能及時接濟。著傳諭該撫，於臘底春初，即按所加之數，一面先行散給，俾小民餬口有資，均霑實惠，副朕軫念至意。（高宗六七六、七）

（乾隆二七、一二、戊戌）諭軍機大臣等：前經降旨，令該撫將被災之齊河、濟陽等三十州縣衛極貧之戶，再行加賑一月，恐俟新正恩旨，行文稍遲，因傳諭該撫一面於歲內先行散給，接濟口食。復念德州等處，毗連直隸，被災稍重，著將極貧各戶，前旨加賑一月者，再加恩展賑一月。其次貧各戶，亦著格外加賑一月，以普惠澤。至明春東作時，有應行借糶兼施，以資力作者，仍照例查辦。至此次極貧、次貧普加一月賑糧，或於新正奉到諭旨後散給，或於年內豫行接濟之處，著阿爾泰循照前旨，酌量情形，妥協經理。將此再行傳諭知之。（高宗六七六、一六）（高宗六七六、一五）

（乾隆二八、一、庚申）又諭：上年山東濟南、武定等屬，間被偏災，疊經降旨，令該撫等加意撫綏，俾小民毋致失所。第念時屆春初，賑期已滿，而田間東作未興，猶不免艱於覓食，朕心深為軫念。著加恩將被災之齊河、濟陽、禹城、臨邑、長清、陵縣、德州、德平、平原、德州衛、惠民、陽信、海豐、樂陵、商河、霑化、壽張、聊城、堂邑、博平、茌平、清平、冠縣、臨清、邱縣、高唐、恩縣、夏津、武城、東昌衛等三十州縣衛內，所有極貧之戶，再行加賑一月，以資接濟。該撫其董率屬員，實心經理，務令均霑實惠，稱朕軫恤貧黎至意。該部遵諭速行。（高宗六七八、二）

（乾隆二八、一、壬戌）又諭：上年山東濟南、武定等屬被水災黎，業

經降旨將齊河等三十州縣衛極貧之戶，加賑一月，以資接濟。更思該省與直隸、天津、河間災地毗連，被水稍重，當此東作未興之前，閭閻生計，自多拮据。著格外加恩，將齊河等三十州縣衛內所有極貧戶口，除前加賑一月外，再予加賑一月。其餘次貧各戶，並著通行加賑一月，以溥惠澤。該撫阿爾泰妥協經理，毋致一夫失所，副朕軫恤災黎、有加無已至意。該部遵諭速行。（高宗六七八、六）

（乾隆二八、一二、辛卯）賑貸山東濟寧、魚臺、金鄉、嘉祥、城武、鉅野、濟寧衛、臨清衛等八縣衛水災飢民。（高宗七〇〇、一〇）

（乾隆二九、一、甲寅）諭：上年東省秋收，俱屬豐稔，惟濟寧等七州縣衛，自六、七月間，河湖並漲，低窪地畝，間有被淹，雖經加恩撫賑，第時當春月，例賑將停，而東作方興，麥秋尚遠，農民生計，仍恐未免拮据。著再加恩，將濟寧、魚臺、金鄉、城武、鉅野、濟寧衛、臨清衛等七州縣衛成災地方，無論極次貧民，俱各展賑一個月。該撫董率有司，實心經理，用副朕體恤貧黎有加無已至意。該部遵諭速行。（高宗七〇二、二）

（乾隆二九、四、甲申）又諭：前以山東濟寧等七州縣衛瀕河地畝，上年間有被淹之處，業經降旨展賑，其出借籽種等項，應於本年麥熟後徵還。現在該省春雨霑足，二麥可望豐收，但念民氣初復，正資麥熟接濟，著加恩將濟寧等州縣衛，所有借給籽種，俱緩至本年秋後，再行徵收，以紓民力。該部即遵諭行。（高宗七〇八、四）

（乾隆三〇、一〇、己未）又諭：前據崔應階奏，濟南、武定等屬，間有被水地畝，或勘不成災，或分數輕減，現將無力貧民，照例借給麥本等語。該省被災窪地，雖僅屬一隅，且業已分別撫綏，小民自不致失所。惟是被水之餘，秋收分數既減，明春青黃不接之時，窮黎生計或不免拮据。著傳諭崔應階，將偶被偏災之各州縣，應否加恩賑卹之處，即行查明，據實覆奏，候朕酌量降旨。（高宗七四七、五）

（乾隆三〇、一二、丙辰）諭：前因山東濟南、武定等屬間有被水地畝，經該撫題請分別賑濟，兼令借給麥本。現在時屆隆冬，賑期已滿，而屈指麥秋尚遠，民食未免拮据。著加恩將被災稍重之濟南府屬齊河、濟陽、長清、臨邑、德平，武定府屬惠民、樂陵、青城、商河、濱州、陽信、利津、霑化、蒲臺，青州府屬高苑等十五州縣極次貧民，概予加賑一月。該撫其董率所屬，實心經理，務俾窮黎均霑實惠，副朕加惠元元至意。該部遵諭速行。（高宗七五〇、一一）

（乾隆三一、七、甲午）諭曰：崔應階奏，東省七月初旬，雨水稍多，

運河宣洩不及，汶河亦一時漲發，致有漫溢。濟南、東昌、泰安、武定、兗州、曹州等府屬州縣內，低窪邨莊，俱有被水之處，穀豆間至損傷，民房亦不無衝塌等語。看來該省被水情形較重，朕心深為廕念。著該撫即速前往查勘，有應行撫卹者，即照例撫卹。有已經成災處所，並著查明分數，按其輕重，分別悉心妥辦，俾閭閻不致失所。該部即遵諭行。（高宗七六五、一四）

（乾隆三二、一、丁卯）諭：昨秋東省武定、濟南、東昌、泰安、兗州、曹州等府屬瀕臨運河之處，偶被水災，業經飭令該撫加意撫卹，蠲賑兼施，俾無失所。但念新春東作方興，距麥秋尚遠，無力貧民口食尚未免拮据。著加恩將被災較重之惠民、陽信、海豐、樂陵、商河、濱州、利津、霑化、蒲臺、禹城、聊城、堂邑、博平、茌平、莘縣、高唐、東昌衛等十七屬，及被災次重之齊河、濟陽、臨邑、長清、陵縣、德州、德平、平原、德州衛、東平、東阿、東平所、金鄉、魚臺、濟寧、嘉祥、汶上、壽張、濟寧衛、武城、定陶、鉅野、鄆城、濮州、范縣、觀城、朝城、清平、臨清衛等二十九屬，無論極次貧民，再行加賑一月，俾春初力作之時，得資接濟。該撫其董率所屬，實力奉行，務使窮黎均霑實惠。該部遵諭速行。（高宗七七六、二）

（乾隆三四、九、丁亥）賑卹山東東平州、東平所二處本年被水貧民。（高宗八四二、一二）

（乾隆三四、五、庚戌）山東巡撫富明安奏：本年麥收豐稔，各屬民借未還倉穀，請照六斗抵穀一石之例交倉。得旨：如所議行。（高宗八三五、一九）

（乾隆三四、一一、壬辰）加賑山東東平州、東平所本年水災飢民。（高宗八四六、二二）

（乾隆三五、一一、甲辰）加賑山東齊河、濟陽、禹城、陽穀、壽張、范縣、觀城、朝城、聊城、堂邑、博平、茌平、清平、莘縣、高唐、濟南衛、東昌衛十七州縣本年水災貧民，緩徵舊欠錢糧；並予章邱、鄒平、新城、臨邑、長清、陵縣、德州、平原、商河、利津、高苑、博興、樂安等十三州縣葺屋銀兩有差。（高宗八七二、四）

（乾隆三六、二、戊子）諭：朕恭奉安輿，時巡齊魯，省方問俗，念切民依，所有經過地方本年正賦，業經降旨酌定分數蠲免。至上年間有被水之濟陽等十三州縣衛，據該撫富明安奏稱，現在民食均無缺乏，農作有資，惟齊河、禹城、茌平、莘縣民力稍覺拮据，請每畝酌借籽種銀一錢、牛具銀一錢等語。目下春疇融潤，耕種屆期，該四縣上年被水較重之地，尤須及時接濟，按畝貸以籽具，體卹常例宜然。但借項仍應徵完，尚非格外施惠之意。